

आकाशवाणी जयपुर—अजमेर
प्रादेशिक समाचार

दिनांक 04.11.2025

समय: 18.45 बजे

- राज्य मांय आज सड़क सुरक्षा अभियान सरु करी ज्यो—यातायात नियमां री अवहेलना करण वाळां रे खिलाफ़ कार्यवाही।
- प्रदेश मांय वोटर लिस्टां रा विशेष गहन पुनरीक्षण कार्यक्रम रा तैत आज सर्वे सरु व्ह्यो।
- राष्ट्रपति द्रौपदी मुर्मू विद्यार्थियां ऊँ शिक्षा ने वंचित तबका री जनता री सेवा अर देश बणावण मांय काम लेवण बाबत् कह्यो।
- नई दिल्ली मांय व्हेवण वाळा अंतर्राष्ट्रीय व्यापार मेळा मांय ई साल राजस्थान ने “पार्टनर स्टेट” बणायी ज्यो।

000

जयपुर मांय काल व्ह्या ज़ोरदार सड़क हादसा पाछे आज आखा राज्य मांय सड़क सुरक्षा अभियान चलायी ज्यो। 18 नवम्बर ताई चालण वाळा ई अभियान रा तैत परिवहन अर पुलिस विभाग गैर कानूनी तरीका ऊँ चाल रही गाड़ियां रे खिलाफ़ कार्यवाही कीनी। परिवहन विभाग रा अतिरिक्त आयुक्त ओ.पी. बुनकर बतायो के यातायात नियमां री अवहेलना करण वाळां रे खिलाफ़ नियम रे मुजब कार्यवाही करी जा रही है।

000

ई बीचे पुलिस न्यारा—न्यारा शहरां मांय अर नेशनल हाईवे माथे तेज़ गति ऊँ अर शराब पी र गाड़ियां चलावण वाळां रे खिलाफ़ कार्यवाही कर रही है। ध्यानजोग है के मुख्यमंत्री भजनलाल शर्मा राज्य मांय लारला कुछ दिनां ऊँ व्हे रह्या सड़क हादसां ने ध्यान राखता थकां न्यारा—न्यारा महकमां रा अहलकारां रे सागे काल रात मीटिंग कीनी ही, जिण मांय सड़क हादसां री रोकथाम सारु जरूरी जतन करण रा हुकम दिया ज्यो। ई बीचे काल जयपुर मांय व्ह्या सड़क हादसा रे कारण जख्मी व्ह्या 14 जणा रो जयपुर रा सवाईमानसिंह अस्पताल मांय ईलाज चाल रह्यो है ज्यां मांय ऊँ दो जणा री हालत चिंता जोगी है।

000

प्रदेश मांय वोटर लिस्टां रा विशेष गहन पुनरीक्षण—एसआईआर रो काम आज सरु व्हे ग्यो। ई रा तैत बूथ लेवल रा अहलकार— बीएलओ घर—घर जा र सर्वे रो काम कर रह्या है। बीएलओ वोटर लिस्टां मांय नाम वाळा लोगां ने विशिष्ट गणना प्रपत्र बांट रह्या है जिण मांय वां री वोट देवण ऊँ जुड़ी जाणकारियां शामिल है। साल 2003 री वोटर लिस्ट मांय ज्यां रो नाम हो, वां ने कोई और कागजात देवण री जरूरत नी है। एसआईआर रो काम 4 दिसंबर ताई चालेला। ई पाछे 9 दिसंबर ने वोटर लिस्टां रो मजमून जारी कर्यो जावेला। आवता साल आठ जनवरी ताई दावा अर आपत्तियां पेश करी जा सकेला। 9 दिसंबर 2025 ऊँ 31 जनवरी, 2026 बीचे दावां अर आपत्तियां रा बारा मांय सुणवाई अर सत्यापन व्हेला। श्रीगंगानगर री जिला निर्वाचन अधिकारी डॉ. मंजू जनता ऊँ बीएलओ ने एसआईआर सर्वे ऊँ जुड़ी मदद करण री अपील कीनी।

000

राज्य रा मुख्य निर्वाचन आयुक्त नवीन महाजन आज बारां मांय खबरनवीसां ने अंता विधानसभा उपचुनाव रे दौरान चुनाव आदर्श आचार संहिता री पालना अर उपचुनाव री तैयारियां रा बारा मांय जाणकारी दीनी। वे बतायो के जिला प्रशासन अर पुलिस शांति सागे वोट देवण रो काम पूरा करावण सारु सगळी जरूरी व्यवस्थावां कर रह्या है। श्री महाजन बतायो के उपचुनाव सारु हिफाजती दस्तां रा करीब 3 हजार 300 जवान तैनात कर्या जावेला।

000

राज्य मांय साढे 69 लाख ऊँ बत्ता नुवा पात्र लोगां ने राष्ट्रीय खाद्य सुरक्षा योजना ऊँ जोड़ी ज्यो है। योजना ऊँ जुड्या 'गिव अप अभियान' रा तैत करीब 42 लाख अपात्र लोग मर्जी ऊँ ई योजनां रो फायदो छोड्यो।

000

मुख्य सचिव सुधांशु पंत गांवाई अर दूर-दराज रा हलकां मांय बेहतर क्वालिटी वाळी मोबाइल अर इंटरनेट सेवा तैय करण रा हुकम दीना है। वे आज राष्ट्रीय ब्रॉडबैंड अभियान री राज्य स्तर री समिति री जयपुर मांय राखी ज्यी मीटिंग मांय बोल रह्या हा। वे बीएसएनएल 4जी सैचुरेशन परियोजना रा काम रो जायजो लीनो। मुख्य सचिव ऑप्टिकल फाइबर केबल बिछावण सारू खोदी ज्या खाड़ा सही तरीका ऊँ भरण रा हुकम दीना।

000

राष्ट्रपति द्रौपदी मुर्मू कह्यो है के भणार्ई-लिखाई केवल खुद रे पाण ऊबा व्हेवण रो साधन नी है, बल्कि समाज अर देश रा विकास री प्रेरणा ई है। वे आज उत्तराखंड रा नैनीताल मांय कुमाऊँ विश्वविद्यालय रा 20वां दीक्षांत समारोह मांय बोल रही ही। राष्ट्रपति विद्यार्थियां ऊँ शिक्षा ने वंचित तबकां रा लोगां री सेवा करण अर देश बणावण मांय काम लेवण बाबत् कह्यो। श्रीमती मुर्मू कह्यो के शिक्षा, बुद्धि, कौशल अर नैतिक मूल्यां ने मजबूत बणावे है।

000

भगवान बिरसा मुंडा री डोढ सौ वीं जयंती सिलसिला मांय मणाया जा रह्या 'जनजातीय गौरव पखवाड़ा' रा तैत ब्यावर अर कोटपूतली-बहरोड़ जिलां रा स्कूल-कॉलेजां मांय निबंध लेखण, भाषण देवण अर चित्रकला री होड़ां राखी ज्यी। आं कार्यक्रमां रो मकसद जनजातीय संस्कृति रा बारा मांय जाग जगावणो हो। पाली रा बांगड़ कॉलेज मांय ई निबंध लिखण अर चित्र बणावण री होड़ां राखी ज्यी। जीतण वाळां ने 6 नवम्बर ने ईनाम दिया जावेला।

000

लौहपुरुष सरदार वल्लभभाई पटेल री जयंती रा सिलसिला मांय मनाया जा रह्या राष्ट्रीय एकता पखवाड़ा रा तैत आज करौली मांय यूनैटी मार्च निकाली ज्यो, जिण मांय नगर परिषद री सभापति डॉ. राजरानी शर्मा, जनता रा नुमाइन्दा, अहलकार, स्कूली विद्यार्थी अर सामाजिक संगठनां रा नुमाइन्दा शामिल व्ह्या।

000

नई दिल्ली मांय 14 नवम्बर ऊँ अंतर्राष्ट्रीय व्यापार मेळो लगायो जावेला। 27 नवम्बर तांई चालण वाळा ई मेळा मांय ई साल राजस्थान ने 'भागीदार राज्य बणायी ज्यो है। ई सारू राजसिको री ओर ऊँ राजस्थान मंडप बणायो जावेला। उद्योग विभाग रा प्रमुख शासन सचिव आलोक गुप्ता आ जाणकारी दीनी। वे बतायो के मंडप मांय कारीगर मौके ई 'वन डिस्ट्रिक्ट वन प्रोडक्ट' रा तैत राज्य रा पारंपरिक व्यंजन बणावेला।

000

सिख पंथ री सरूआत करण वाळा गुरु नानक देव जी रो 556वां प्रकाश परब काल मणायो जावेला। ई मौके गुरुद्वारां ने रंग-बिरंगी रोशनी अर सोहवणा फूलां ऊँ सजायी ज्यो है। पाली जिला मांय ई आज दो दिन रा खास आयोजन सरू व्ह्या। गुरुद्वारां मांय अखंड पाठ, शबद कीर्तन अर गुरु नानक देव जी रा उपदेशां रा बारा मांय चर्चा रा कार्यक्रम राख्या जा रह्या है। म्हाणा पाली खबरनवीस बतायो के काल प्रकाश परब रे मौके गुरुद्वारा ऊँ पंज प्यारा अर निशान साहिब सागे शोभायात्रा निकाली जावेला।

000

भरतपुर मांय प्रभात फेरी निकाली ज्यी अर पाईबाग गुरुद्वारां मांय अखण्ड पाठ करी ज्यो।

000

बीकानेर रो नामी कपिल मुनि मेळो काल सरू व्हेला। इण मांय शामिल व्हेवण सारू जावण वाळा जातरूआं रा सुबीता ने ध्यान राखता थकां रेलवे खास गाडियां चलावेला। उत्तर पश्चिम रेलवे रा मुख्य जनसंपर्क अधिकारी कैप्टन शशि किरण बतायो के बीकानेर अर कोलायत बीचे तीन जोड़ी खास अनारक्षित गाडियां चलायी जावेला। आं मांय ऊँ दो गाडियां काल अर एक गाडी 6 नवंबर ने चलायी जावेला। वे बतायो के अ गाडियां लालगढ़ अर गजनेर टेशनां माथे ई रुकेला।

000

राज्यपाल अर विश्वविद्यालयां रा कुलाधिपति हरिभाऊ बागडे कह्यो है के देश भांत-भांत री भाषावां, संस्कृतियां अर परंपरावां ऊँ मिल र बणे है अर जनता मांय देश रा प्रति निष्ठा अर प्रेम व्हेवणो चाहिजे। वे आज बांसवाड़ा रा गोविंद गुरु जनजातीय विश्वविद्यालय मांय "राष्ट्रीय एकात्मता : विविधता में एक चेतना" मुद्दा माथे राखी ज्यी राष्ट्रीय संगोष्ठी रा उद्घाटन जळसा मांय बोल रह्या हा। ई मौके श्री बागडे देशी री आजादी री लड़ाई मांय भाग लेवण वाळा जनजातीय स्वतंत्रता सेनानियां माथे आधारित प्रदर्शनी ई देखी।